

Timoti Yana Leta Anavelu Paulo Givetokilumina

Kivemala

Yeisu valeyana analaumamala faina Paulo Loma wagaine deliya ise-vagilena, ada gimiyamiya aku Timoti yana leta anavelu givetokilumina. Yana vetokiluma anatova-nai wagaine gilutovonina analuvealika anatova givelilivana.

Timoti tamana kwana Giliki aku inana badi vine Isileli, adiyegana Yunisi. Ada banae Paulo anatoleme, tainei Efeso wagaine tovetu-maganayavo giitaveyabidi, kaduwe bana vaita Paulo natu-moena Yeisu yana yoo wagaidiya. Taidei leta-nai wagaine Paulo tauna analutovona ke yana nuwanuwa lakaidi giinanadi Timoti wagaine, ada kaduwe givonavagadonena ke veumagigi wagaidiya gina atuvefaila ada vewala tunutunugina wagaine gina luveyabina.

Timoti anavesiule ke anayona asevatu. (1:1-18)
Vetolugaviya iwakana Yeisu Keliso faine. (2:1-13)

Gavatogugai Yaubada giawaveiwakanena? (2:14-26)

Tova anaebalauyabu wagaine kaliva inakoyomowa. (3:1-9)

Timoti anaveimeya. (3:10 - 4:5)

Paulo tauna analutovona faina giifufu, ada yana vetalakafoi. (4:6-22)

¹ Iya Paulo, Yeisu Keliso yana afositolo Yaubada yana nuwanuwa wagaine. Tuwaina givonadabadaba vaita gavega Yeisu Keliso nodi ina veseyana, ani biyavo-dina yawai-vagata ina nuwagana. Ada tainei faina givenuwadadaneku ke giimiliku ada valeyana gana awatalatalainena.

² Siule natu aseaseku Timoti. Yaubada Tamada kaduwe yada Kauveya Yeisu Keliso yadi nuwado-geya ina lemelemen ke ina nuwakalikaliyeni, ada kaduwe asease ina kikiveniwalovina.

Timoti anavona asevalu.

³ Timoti, gavesiule lakaina Yaubada wagaine o fainiya. Kamakuweyavo nagona ani Banae wagaine iawaegedi anafaiweya, Iya kaduwe gaawaegeku ke wa nuwafouku yegayegana gafafaisewa Bana faine.† E ada gavesivesiule Banae wagaine aku tova moyaina yadayada ke bogi gaveoveola fainiya.

⁴ Tuwaina gamadusegeni aku utagiya ani nuwaku ginauyena, e ada nuwanuwaku lakaina gavatoveya gada itani ada gada vemwamwala.

⁵ Ya vetumagana velemono Keliso wagaine ganuwaududuna, anafaiweya nagona ina-moe Yunisi† ke tubu vavine Loise, ani badi iawaegedi velemono Keliso anavetumagana wagaine. E ada ganuwaveyalaina oye kaduwe vetumagananai wagainiya gimiyamiya.

⁶ Tainei faina nuwa gana talafolena vaita anuwakabubu Yaubada giveleni yana gugai faina ani una atubodana ada keke ginawe, e ada

† 1:3 Gug 24:16 † 1:5 Gug 16:1

una vetoyogina aveimeya giveleni anafaiweya. Tainei nuwakabubu-nai unuwagana tova-nai nimaku gasedi kuluwaniya ada gaveoveola fainiya.

⁷ Una atuaturubodana faina Yaubada Aluwaluwa Tabuna keke gida veleda ke kana matauta o kai kana vovomumu, aku aiyada Banae toyogina giveda ke kana asevatu, kana nuwakabubu velemoena, ada taudeyavo yada nuwanuwa kana awatadi.[†]

⁸ Taidei faina keke una vovomumu yada Kauveya anaawatalatalaina faine.[†] Ada kaduwe Iya yana kaliva gamiyamiya deli wagaine ani keke una vovomumuyeku. Aku aiyada gavavita o kai uloulolo una nuwagadi Yeisu anavaleya iwakana faina, ani tauni una awaegeni wagaidiya e aku Yaubada yana toyogina wagaine afaiweya vitadina una waidi.

⁹ Yaubada Banae gikibababaleda koyona wagaine-deya, ada gidouweda ke wa yada dewa matatabuna yegayegana kana miyamiya Banae yana yoo tabutabudeyavo. Ada kibababalanai vuvuna ani keke yada gugai faina aku Bana Tauna nuwanuwana, kaduwe Banae Tonuwadoga faina. Tuwai-bulubuluna tova aimo keke gida vevuvu, Banae yana nuwadoga wagaine bademowa-deya gimadu venuwadadanena Keliso Yeisu gina imilina babi taidei wagaine ke gina kibababaleda.[†]

¹⁰ E ada tova malinai adaTokibababala Yeisu Keliso yana obueta wagaine, tainei Yaubada yana nuwadoga gikiveyegemonina ke adafaiweya

[†] 1:7 Lom 8:15 [†] 1:8 Lom 1:16 [†] 1:9 Efes 2:8-9, Tai 3:4-5

kana itana. Bana Yeisu Keliso alika yana toyogina giyaweli-yabuna, ada kibababala anavaleya iwakana wagaine yawai-vagata anawai giawamogatalena, ke vovoda evagudi keke ina abudala aku wa vovoda kanamiya-vagata.†

11 Tainei valeya iwakana faina, Yaubada givenuwadadaneku ke gana vetoawatalatalaina ke gana veafositolo, ada kaduwe gana vetovewala.†

12 Taidei vuvuna-nai faine gauloulolo anafai-weya. Aku keke maita gada vovomumu, faina Banae-nai gavetumaganena ani gaalamanena, ada ganuwaveyalaina vaita akuveimeya giveleku ani Banae anafata gina itaveyabina, ke yana itaveyabina faine anafaiweya gina naunauwena analaba ginayewa-vagilena.

13 Ada vewala-dina tunutunugina unogalina wagaikuya ani una luluveyabina wagaidiya, wada ya ebaita. Ada wa ya vetumagana ke wa ya nuwakabubu Yeisu Keliso wagaine taidei vewala tunutunugina una vevewala kaliva wagaidiya.†

14 Una nuwaududuna tainei valeya iwakana Yaubada giveleni, ada keke una sivedavedama. Aluwaluwa Tabuna-nai gimiyamiya wagaideya ani gina lemeni ke valeya-nai iwakana Yaubada giveleni ani una itaveyabi-dewedewena, e ada ginamiya anafaiweya tova-nai unuwagana.

15 Bademowa ualamanena vaita tovetumagana moyaidi Eisiya anafafali wagaine ani idibusoyogeku ke imaduyabuyabuku, ada kaduwe yoo-dina wagaidiya kaliva adiselu Figelio ke Elimogi

† 1:10 Ibel 2:14-15 † 1:11 1Tim 2:7 † 1:13 Tai 1:9

nodi.

¹⁶⁻¹⁷ Aku Onesifolo yana manuwa anatomiya nodi ani Kauveya gaveolena ke gina nuwakalikaliyedi. Faina tova-nai giyegemo Loma wagaine, au gilele tufotufona fafali matatabuna wagaidiya analaba ginuwagaku. Ada auwe Iya deli wagaine gamiyamiya nonogana keke faikuya gida vovomumu, aku tova ke tova gielaela gimadumadubodaku ke nuwaku gikivemwamwalina.

¹⁸ Taidei faine gaveola Kauveya wagaine ke gina nuwakalikaliyena tova-nai kaliva matatabuna Kauveya gina vevonayavugidi wagaine. Ada o tauni ualamane-dewedewena gavaiyei wai wagaidiya gilemeku tova-nai gamiyamiya Efeso wagaine.

2

Vetolugaviya iwakana Yeisu Keliso faine.

¹ E aku natuku, tauni una awaegeni Keliso Yeisu wagaine ke yana nuwadogeya gina kivetoyogini.

² Yaku laumamala kaliva moyaidi matadiya o unogalina. Nuwanuwaku kaliva idibudibumwaigadiyavo una venuwadadanedi ada bonaku una vewaledi, e ada badi kaduwe adifaiweya inana mali kaliva ina vewaledi.

³ Una itana, ide tovetumagana ani Yeisu Keliso yana tolugaviya, ada vita tulina tulina kana nuwanuwagadi. Gavavita una nuwagadi Yeisu Keliso faina aga gilubodani keke unaota wagaidiya-deya, aku una fasima ke una atuvefailedi anafaiweya yana tolugaviya iwakana.

⁴ Keke tamo tolugaviya tauna gina awaenge mali nuwanuwa wagaidiya, aku gaviya gagana faina gina nuwanuwa e ada tolugaviya-nai anatonagona nuwana gina kivemwamwalina.

⁵ Anafaiweya vemadu. Tomadu ani kai keke madu anaveimeya gina muliye, aga keke meyameyaganina vewainagona anafata ginavai.†

⁶ Kaduwe anafaiweya tobakula, banae yana idibudibumwaiga faina, gilubodana bakula guwana gida maduvaina.

⁷ Tainei vona ebaluvefota toiye gaifufuyedi ani yada Kauveya yana gugai faina. Una nuwanuwayedi, faina Kauveya nuwa gina kivemalina gaitoma moyaina wagaidiya.

⁸ Aku Yeisu Keliso una nuwaududuna. Banae Kini Deivida anaunuma wagaine gitubuga, ada gialika aku Yaubada gisiveyawana alika wagaine-deya. Taidei valeya-nai iwakana gavevewalayena kaliva wagaidiya,†

⁹ ada tainei wagaine vita ganuwagadi vaita Iya seyana tokoyona lakaina anafaiweya, e ada iyogoku seini wagaidiya. Aku Yaubada yana vona ani keke yogoyogona!†

¹⁰ Tainei faina vita moyaidi wagaidiya gaatuvefaileku, ke Yaubada yana kalivayavo venuvenuwadadanidiyavo kaduwe adikibababala ina nuwagana. Tainei kibababala-nai Keliso Yeisu wagaine-deya, Banae wa yana iwakana mamalina miyamiyani-vagina.†

¹¹ Vona taidei ani vona velemoena:

† 2:5 2Tim 4:8 † 2:8 Lom 1:3-4 † 2:9 Fip 1:12-14 † 2:10 Kol 1:24

Kai ide Keliso nodi kaalika,
kaduwe aimo Banae ide nodi kanamiya
wayawaida.†

12 Kai vita wagaidiya kana atuvefailida Banae
faine,

kaduwe aimo Banae nodi kana veimeya.

Kai Banae kana veweyena,

kaduwe Banae aimo ide gina veweyeda.†

13 Tamo tova Keliso kavonadabadabayena
vaita kana muliyena

e ani yada veimeya-nai keke kada muliye,

aku Banae ani tova moyaina yana veimeya
gimuliyena.

Gavana faina? Faina Banae ani keke anafata
Tauna yana nuwanuwa gina venikoie.†

Gavatogugai Yaubada giawaveiwakanena?

14 Taidei gaitoma-dina gaifufuyedi ani ya
kalivayavo una kivenuwaudududi, kaduwe
Yaubada matane una veimeyedi toyogina ada
vona adikivila faidiya ivevonavona ani ina ilovau.
Faina vona kavokavovo keke maita tovanenega
gina lemedi, aku aiyada yadi vetumagana
gina ivekoyo-moedi.†

15 Oye Yaubada yana gugai wagaidiya
una idibudibumwaiga velemonoena, ada waya
alamana yana vona velemonoena una vevewala
tunutunugina. E ada keke maita waya
vovomumu tauni una yegemoneni Banae matane
ke gina awaveiwakaneni, ginavona, “Oye togugai
iwaka.” †

† 2:11 2Kol 4:11 † 2:12 Mad 10:33, Luk 12:9 † 2:13 Naba
23:19, Lom 3:3-4, Tai 1:2 † 2:14 Tai 3:9 † 2:15 Tai 2:7-8

¹⁶ Aku vona kavokavovo tainei Yaubada anave-moimoina keke gida luboda ani una velovogedi. Badi gavega keke nuwanuwa velemono ana aku vona kavokavovo wagaine iawaegedi, ani inau atuwadeya-mowa Yaubada wagaine-deya e ada yadi koyona iluvefovefodi.

¹⁷ Taidei kaliva-dina koyodiyavo yadi vewala-nai gina tubuga-mowa vaita koliya gialabwakebwakeina, ada wagaine alika gina yegemo. Biyavo-dina wagaidiya-deya kaliva adiselu ivevewala sidamana, adiyegana Aimeniyo ke Fileto.

¹⁸ Badi kaliva-dina adiselu ani Yaubada yana nuwanuwa velemono anawai inuvuyoyena, ivonavona, "Toalika yadi yawa-vagila anatova bademowa giyegemona." E ada tovetumagana tufodi yadi vetumagana Yeisu wagaine ani ikivekoyona ke nuwadi ikivevoganidi.

¹⁹ Badiyavo ani iifuifufu taidei anafaiweya, aku Yaubada yana nuwanuwa velemono ani anafaiweya avutuwa gisedonena** ke gimidimididi toyogina, ada wa anamatawa vetovetokilumina ani Yaubada wagaine-deya, givona,

"KAUVEYA yana kalivayavo bademowa giala-

** **2:19** Wadedeku Isileli anafali wagaine manuwa lakaidi iyogoyogodi ada adiavutuwa ani kabala lakaidi. Ada adigiduwa seyana ani toni manuwa gina vetokilumina avutuwa anakabala tabodiya gavaiyamu yana nuwanuwa anafaiweya, ada taidei wagaine mali kaliva ina alamanena vaita manuwa-nai ani kaliva-nai tauna yana manuwa. E ada taidei maita-nai wagaine tovetokiluma givonaluvefosau vaita Yaubada yana nuwanuwa anaavutuwa anafaiweya yana ekalesiya gikivemididina anafaiweya yana manuwa.

manedi.” †

Ada kaduwe givona,

“Badi gavega ivonavona, ‘Ime KAUYEYA yana kalivayavo,’ aga gilubodadi dewa koyona ina vedomobubusedi.”

²⁰ Seyana ebaita gana ifufuyena. Tokaikaiwabu yana manawa wagaine nauwa tulina tulina imiyamiya. Nauwa tufodi ibubudi gola ke siliva wagaidiya ani fatadi lakaidi, tufodi ibubudi ai ke babi fotafotana wagaidiya. Nauwa kaikaiwabudi iseliyedi gavega wakawaka adiyegana lakaidi faidiya, aku nauwa ibubudi ai o kai babi wagaidiya ani adivegugai keke gaitoma lakaina.

²¹ Tainei nauwa-dina ani ide kaliva anafaiweya. E ada kai gaito seyana nuwanuwa koyona gina vedomobubusena aku gina awaegena nuwanuwa yegayegana wagaidiya, aga banae anafaiweya nauwa kaikaiwabuna iseliyena gavega wakawaka adiyegana lakaidi faidiya. Banae kaliva-nai seseliyena Kauveya yana gugai faine e ada tabutabuna Bana matane. Ada gugai iwakana tulina tulina faidiya banae kikidewadewana, e ada Kauveya yana gugai faine gina vegugaiyena.

²² Taidei faina tubulakata yadi dewa tova moyaina inuwanuwa kavu vovo faina ani dewa-nai una osena, aku tauni una awaegeni wai iwakana wagaine, anafaiweya unadewa yegayegana, Yaubada una vetumaganena,

† 2:19 Iyo 10:14-15

una vetonuwakabubu, ada wa ya nuwaniwalova una miyamiya kukuyeya. Kai tayuwe wai-dina wagaidiya una naunau, aga badi gavega wa aseasedi yegayegana yadi nuwanuwa isena Kauveya wagaine ada iveoveola wagaine, ani oyeni badi nodi wana naunau.

²³ Kaliva tufodi tova tova ivevonavona gaitoma-kavokavovo ke dewa kwavakwava faidiya. Yadi vevonavona-dina ani una velovelovogena, faina ualamanena kaliva ina vevonavona tayuwe anafaiweya ani tova kabisona ina vebutu nodi ina gavekwavekwageya.

²⁴ Ada ide Kauveya yana togugaiyavo keke gida lubodada kana gavekwavekwageya, aku aiyada wa yada nuwakabubu kaliva moyaidi kana dewedi iwakana, kana vevewaledi iwakana, ada kana atuvefailedi.[†]

²⁵⁻²⁶ Ada kaduwe badi gavega Yaubada yana vewala ivenibainena ani nuwabikeya kana kivetuvetunugidi. Badi kaliva-dina ani Seitani yana dai wagaine givebeudi, e ada yana ebaveimeya dibune imiyamiya ke yana nuwanuwa iidibumwaigena. Kai nuwabikeya kana kivetuvetunugidi, aga kai Yaubada gina awaegedi ke ina nuwawilana, ada taudiyavo ina awaegedi yana nuwanuwa veleomoena wagaine. E ada nuwadi gina malina ke yadi nuwanuwa baladi gina avaidi, ada inaota Seitani yana dai wagaine-deya.

3

[†] 2:24 1Tim 3:3

Tova anaebalaulyabu wagaine kaliva inakoyomowa.

¹ Nuwanuwaku una alamane-dewedewena vaita Yeisu yana yewa-vagila anatova gina velilivana wagaine, tova vita-moedi ina yegemona.†

² Faina kaliva ina nuwanuwa taudiyavo gagana faidiya, mani ina itaitaluvadigena, ada taudiyavo adiyegana ina kikilakaidi, kaduwe ina nuwalaka ke inavona awadamana mali kaliva wagaidiya. Inadiyavo ke tamadiyavo keke ina vemoimoinedi, keke inavona vesiule adinuwakabubu faidiya, kaduwe badi keke tabutabudi Yaubada matane aku dewa yuyuvana idewadewayedi ada wa yadi koyona imiyamiya.

³ Kaduwe tova-dina wagaidiya kaliva keke nuwakalikali ina seseyegemone, keke ina venuwaega, kaliva ina veloidi e ada adiyegana ina kikivekoyona, keke maita taudiyavo ina awatadi, ina manimanini kaliva wagaidiya ke ina ivegilagidi. Ada dewa iwakana keke maita nuwadi gidavai.†

⁴ Kaduwe kaliva-dina tovewaibubuna, ada keke wa yadi nuwanuwa aku ina madumaduvona o kai ina madumadugugai, ada nuwalaka taudiyavo. Keke maita Yaubada wagaine yadi nuwanuwa ida sesei aku aiyada taudiyavo yadi vemwamwala gagana faina ina nuwanuwa lakaina.

⁵ Yoo-dina adiita ani anafaiweya vaita badi totafalolo anafaiweya ideyavo, aku kebuladiya itafatafalolo, keke aseasedi wagaidiya-deya.† E ada yadi dewa wagaidiya Yaubada yana toyo-

† 3:1 1Tim 4:1 † 3:3 Lom 1:29-31 † 3:5 Mad 7:15,21, Tai 1:16

gina iveweyena. Badi kaliva-dina anafaiweya ani keke una vevetubuiyanedi aku analauboda unamiya tabae.

⁶⁻⁷ Faina kaliva tufodi badi adimwatuguya ani ilukulukunau mali kaliva yadi manuweya, ada vevine aseyakayakadiyavo ani biyavo-dina yadi nuwanuwa isigadagadadi. Badi vevine-dina yadi koyona moyaina vaita veinuwana anafaiweya ilulutovonina, ada tova ke tova nuwanuwa koyona wagaidiya iawaegedi. Kaduwe tova moyaina vewala tulina tulina ivenovenogalena, aku Yaubada yana nuwanuwa velemoena ani kekemowa adifaiweya ina inana.

⁸ Anafaiweya tuwai-moena kaliva adiselu adiyegana Yanesi ke Yamibelese ^{**} Mosese ivenibainena, kaduwe biyavo-dina Yaubada yana nuwanuwa velemoena ivenibainena. Ada nuwainagediya fwaya ke nuwanuwa koyodi givemagadi, ada Yaubada anavetumagana wagaine keke ida awaegedi velemoena.

⁹ Aku badi aimo kaliva keke ina fwayadi tova manamanawena, faina yadi nuwanuwa kwavakwava ani kaliva moyaidi ina itanuwagana, anafaiweya tuwaina giyegemona Yanesi ke Yamibelese wagaidiya.

Timoti anaveimeya.

¹⁰ Aku Iya keke badi anafaiweya o ualamanena. Faina o Iya nodi malamala moyaina e ada yaku vewala, yaku dewa, yaku nuwanuwa vuvuna,

^{**} **3:8** Taidei kaliva-dina adiselu Yanesi ke Yamibelese, badi tovebalabalauma Itipita wagaine ani Mosese iawavekoyoyena tova-nai gimidimididi Felo matane. (Iyeg 7:11-22, 8:7-19)

yaku vetumagana, yaku atuvefaila, yaku nuwak-abubu, yaku asevatu, ani bademowa uitana.

¹¹ Ualamanena kaliva vita moyaina iveleku ada uloulolo ganuwagana aku gaatuvefailedi. Una nuwaududuna gavaiyamu idewa wagaikuya melala toiye Anitiyoki, Aikoniyanu ada Lisita wagaidiya. Velemoena vita lakaina ganuwagadi kaliva nimadiya, aku Kauveya gikibababaleku vita-dina matatabuna wagaidiya-deya.[†]

¹² Vona velemoena, gavega moyaidi Yeisu Keliso nodi iveseyana e ada nuwanuwadi Yaubada yana nuwanuwa anafaiweya ina dewadewa, aga vita ina nuwagadi kaliva nimadiya.[†]

¹³ Aku badi kaliva koyodiyavo kaduwe tovefwayafwaya ani yadi koyona gina tubuga ada au ginakoyo-mowa. Badiyavo mali kaliva ina fwayanegenegedi kaduwe mali kaliva badi ina fwayanegenegedi.

¹⁴ Aku oyeni ani gava nuwanuwa tunutunugina wagaine usikulu ke uvetumagana velemoena, vewala-nai una kikiabidonena.[†] Faina ime wagaimeya usikulu ani ualamanema wa amavetumagana.

¹⁵ Ada kaduwe, aimo kabisoniya uvebutu Yaubada yana vetokiluma tabutabuna anaalamana uvaivaina ke unauwena-deya tova malinai. Vetokiluma-nai ani anafata kaliva gina nuwauyaveledi e ada wa yadi vetumagana taudiyavo ina awaegedi Yeisu Keliso wagaine ke kibababala ina nuwagana.

¹⁶ Yaubada yana vona Buki Tabu wagaine,

[†] **3:11** Gug 13:14-52, 14:1-20 [†] **3:12** Iyo 15:20 [†] **3:14** 2Tim 2:2

ani matatabuna Banae Aluwaluwana tovetokiluma gialaveleveledi mamauwe ivetokilumina.† Tayuwe vona-dina yadi gugai taidei anafaiweya. Nuwanuwa velemonoena ivevewaleda, iluluwageyeda yada koyona faidiya, ada kaduwe ikikivetunuda ke ivevewaleda gavaiyamu kanadewa yegayegana ayo Yaubada kana kivemwamwali.

¹⁷ E ada taidei anafaiweya Yaubada yana kali-vayavo gikidewedeweda, ke adafaiweya-mowa yana gugai iwakadi moyaina kana gugaiyedi.

4

¹ Aimo Yeisu Keliso ginayewa-vagilena ke yana ebaveimeya ginasena, ada yawayawadiyavo ke alialikadiyavo gina vevonayavugidi.† Taidei faina gavonavonavagadoneni Banae ke Yaubada matadiya taidei anafaiweya.

² Yaubada yana vona una lulumamalena. Kai wagainiya tova-nai iwakana o kai keke, oye alauboda bademowa kikidewadewa ke afaiweya una lumamala. Wa ya vewala dewadewa ke wa ya atuvefaila lakaina kaliva yadi dewa koyona faidiya una kivetuvetunudi, una vonavona asevatudi, ada badi nuwanuwadi koyona ina kiveyabi-vagina ani una vonavona vagadonedi toyogina ke ina segena.†

³ Tova moyaina una vewavewaledi anafaiweya, faina aimo tova gielaelai wagaine kaliva keke nuwanuwadi vewala velemonoena ina nogala,†

† 3:16 2Pi 1:21 † 4:1 Gug 10:42, Lom 14:9 † 4:2 Gug 20:20,31

† 4:3 1Tim 4:1

aku aiyada badi yadi luvadiga faina tovewala fwayafwayadiyavo ina leleledi e ada gavavewala yadi nuwanuwa koyona analauboda, tainei ina venogalena.

⁴ Ada Yaubada yana nuwanuwa velemono ananogala ina dibusoyogena, e aku kaliva yadi nainaiya tainei vona kavokavovo ani wagaidiya ina awaegedi.

⁵ Aku oyeni ani tova moyaina tauni ya dewa una itaveyabidi velemono. Ada vita moyaina wagaidiya una atuvefaila, Yeisu Keliso anavaleya iwakana una lulumamalena ke kaliva ina awaegedi Banae wagaine, ada gavagugai Yaubada giveleni, analauboda una gugaiyedi.

Paulo tauna analutovona faina giifufu.

⁶ Taidei anafaiweya gavonavona wagainiya faina galutovonina vaita yaku tova bademowa givelilivana-mowa ke babi taidei gana miyasegena. Anafaiweya vebolavoi anawaini iiwana Yaubada yana vebolavoi wagaine,[†] kadu anafaiweya Iya bademowa iiwaiwaku.[†]

⁷ Iya Keliso faine bademowa gavediwe ke gaviya iwakana galugaviyayena. Tomadu yana vemadu giluyabuna anafaiweya, Iya bademowa gavediwe ke yaku vemadu galuyabuna. Keliso anavetumagana-nai bademowa gaitaveyabina.

⁸ E ada yegayegana anakedukedu kaikai-wabuna bademowa ise-vagina faikuya.[†] Kauveya Banae Tovevonayavuga tunutunugina ani

[†] **4:6** Eba 35:14, Iyeg 29:40-41, 30:9, Naba 4:7, 15:5 [†] **4:6** Fip 2:17

[†] **4:8** 1Kol 9:25, 1Pi 5:4, Ive 2:10

aimo yadayada-nai wagaine akukedukedu-nai gina veleku. Ada keke Iya akukaibe gina veleku, aku kaduwe gavega moyaidi Banae inuwak-abubuyena ke yana yegemona iveitabodabodena ani badi nodi.

⁹ Timoti, nuwanuwaku una vediwe ke una maduelai wagaikuya.

¹⁰ Faina Kelesani ginau Galetiya, ada Taito† ginau Dalimatiya. Ada Dimasi† babi taidei ananuwanuwa ani nuwana givaina, e ada giota-yabuyabuku ke ginau Tesalonaika.

¹¹ Aku Luke gagana nodi amiyamiya. Malika una vagaule nodi wanaelai, faina banae aku-toleme lakaina yaku gugai wagaine.†

¹² Tikiko† bademowa gaimili ginau Efeso.

¹³ Tova-nai unaelai aga akunuya badobadona gase-vagaina Kalipo yana manuweya Tolowasi-deya† ani una vaina, ada kaduwe nuwanuwaku lakaina buki uwalugedi, aku velemonoena buki-dina sifi kwafilidi wagaine ibubudi ani una aliyedi.

¹⁴ Aku Alekisanida† banae kainumu aditoibubuna ani vita moyaina giveleku. Kauveya aimo gina lufata yana gugai adilauboda anafaiweya.

¹⁵ Ada o kaduwe gilubodani tauni una itaveyabini kaliva-nai wagaine, faina banae yada vewala givenibainena velemonoena.

¹⁶ Iya akuvevonayavuga nagona wagaine ani keke tamo gaito gida awabababala faikuya. Au

† 4:10 2Kol 8:23, Gal 2:3, Tai 1:4 † 4:10 Kol 4:14, Fim 24 † 4:11
Gug 15:37-39 † 4:12 Efes 6:21 † 4:13 Gug 20:6 † 4:14 1Tim
1:20

matatabudi iota-yabuyabuku. Gaveola Yaubada yadi koyona gina venuwaegau.

¹⁷ Badi iota-yabuyabuku aku Kauveya gimididi lilivakuya ada toyogina giveleku,[†] e ada Iya akufaiweya Yeisu valeyana matatabuna gana awatalatalainena badi keke meIsileli moyaidi wagaidiya ke adifaiweya ina nogalina. Ada Yaubada yana lemeya etoyavuga ganuwagana laiyoni** awadiya-deya.

¹⁸ Kauveya gina kibababaleku vita seyana seyana wagaidiya, ada gina aliyeku iwakana yana ebaveimeya gabama wagaine. Banae anayegana kana kikilakaina tova matatabuna keke ginaavai. Ika, anafaiweya.

Paulo yana vetalakafoi.

¹⁹ Yaku nuwakabubu Filisila ke Akwila wagaidiya,[†] ada kaduwe badi imiyamiya Onesifolo yana manuwewa ani wagaidiya.[†]

²⁰ Elasito[†] gimiiya Kolinita wagaine, ada Tolofimasi giveoga faina Milito-deya gamadusegena.

²¹ Una galuvaluva-mowa ada una maduelai idedeku muliya-yo yagugula anatova gina vevuvu. Yubulo, Pudeni, Laino ke Kalodiya ada kaduwe tubuiyadeyavo tovetumagana matatabudi yadi nuwakabubu wagainiya.

[†] **4:17** Gug 23:11, 27:23 ** **4:17** Tayuwe tova-nai wagaine Loma anatoimeya lakaina ani tova moyaina Keliso anatovetumaganayavo givevemataavulogidi. Yana tolugaviya gina veimeyedi ke tovetumagana ina lutunetunedi ina nauwedi fafali ivewagana 'Kolisiyamu' wagaine, ada wadedeku laiyoni ina luvealikadi.

[†] **4:19** Gug 18:2-3 [†] **4:19** 2Tim 1:16-17 [†] **4:20** Gug 19:22, Lom 16:23

²² Timoti, Kauveya gina kwayabuni. Oyeni ke tovetumagana matatabuna nodi yana nuwado-geya wana miyamiya. Ika, anafaiweya.

Iyayeku Paulo

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2